

Mimò Dwata i Klamang Banweh  
(Dyéńisis 1)

Di kye fa landè to balù satu to landè. Na landè duh, na landè bulen, na landè blatik fa dù. Bay balù landè kdee én nun Dwata kye du taknè nun Dwata.

Na funah mimò Dwata langit dtù di tah. Éń gumnean uman gumnè dad kasaliganan. Na nimoan dù i klamang tanà, bay mahal baweh di tanà sadni. Landè mto déén di tanà na slame kifuh klamang di tanà én.

Nè nean satu duh di kye tambù nan nimò Dwata déén di klamang banweh. Na tnanin duh i kimò Dwata, na manan, "Malwa nan" na nun kalwa nan. Éń malwa én dnagit Dwata mduh na i kifuh dnagitan butang. Taman tafnge nan i tnanin duh.

Na di galwen duh tuad nimò Dwata. Duh ani nimoan i langit dtù di tah. Na dtù di sangal

i langit, én i gumnè Dwata.

Na kgimoan i langit na nun fa nimò Dwata. Di gatlun duh talù Dwata lêman na santifunan i yéél du fye ku mngalam, na fye dù ku nun kafag tanà. Na dnagitan dad yéél én mahin na i man dademe yéél én lanaw. Na i kafag gumnè dnagitan tanà. Na kastifun Dwata dad yéél na tanimò nan Dwata dad bulul, du landè dad bulul fa. Na dad malnak uman malbang bulul nimò Dwata dù. Na ftaboan malnak kayo na malbang kayo, na dad bulek, na dad anag, na dad gulay fa. Kdee bung knaan nimò Dwata nan.

Na di gfatán duh lêman talù Dwata nan. Na nimoan i duh uman i bulen uman dad blatik. Na blén di dale bang knengla. Na tagadè Dwata gablà i kdee blatik. Tagadean dagit kliit i man satu blatik, du kenen sa mimò dun. Male Dwata tan i dalan gumagu i man satu satu blatik.

Na déén di tah tanà too manak fa landè uni

fa. Na kakei nan i glimen duh na talù Dwata lèman. Na msut dad dee bung nalaf. Na déén dù msut dee bung anak di bnas mayeng. Nun fulè anak di bnas, nun mlalei, nun mlunu, na nun fitam. Nimò Dwata bong dee batak nalaf na anak di bnas dù. Too fye baweh kdeela. Teen Dwata kdee i nimoan na man nawan too fye.

Na di gnaman duh nimò Dwata dad Imanaf di bali na i man dad Imanaf di bnas na i man dee bung ulad uman kdee bung mamang. Nimò Dwata i kalabaw uman i balos. Nimoan i sewe uman i langad na uman dee dad mamang di tanà. Na dini di tah tanà nan nun dee bung uni. Talà nan manak! Bay là sfati kdee bung Imanaf én, balù satu landè sfati. Na too fye nawa Dwata du gadean too fye baweh kdee dad nimoan.

Kabay teen Dwata dee Imanaf nimoan én

landè milè kenen na kamdo kenen. Na teenan dù landè fakay talù di kenen na mlé fye di kenen. Én duenan nun fa nimò Dwata too fye fa baweh di kdee munah nimoan én. Na nimoan nan i to. Na to én kanbongan nawa Dwata na dnayenan Dwata kadang di fulé duh. Nè nean nulut Dwata kfung di tanà. Na mdà di kfung én nimò Dwata i lagi. Na fuhang Dwata i nawan di kenen na lamnawa nan to én. Na én duenan mite lagi én, na tamlinge, na gtaalù, na gagu, na fulung faldam fa, du én nawa to én fdu di Dwata. Dtù di lam to én nun fufung, mlaan, na tnai. Alò Dwata fakay mimò én. Na du lagi én fakay faldam na fakay nalékan fye ku demen sasè bay dad Imanaf là fakay mimò gambet én, du mdatah i to fa di dad Imanaf. Kdee Imanaf na anak di bnas na nalaf déén di tah tanà mimen i to én tanimò i Dwata. Na dnagit Dwata lagi én Adan. Na Adan tnanin to nimò Dwata.

Nè nean nebe Dwata kdee dad Imanaf uman  
anuk di bnas di ku Adan na blé Adan dagitla.

Klit i Imanaf mahal baweh na mahal ukum dù.

Na kagdagit Adan kdee bung Imanaf man  
Dwata nan, "Là too fye ku landè demem. Nimògu

nan demem." Na kagtalù Dwata én na fkudang  
Dwata Adan. Na kio kudang Adan nwè Dwata  
satu lohok Adan. Na mdà di lohok Adan nimò  
Dwata i libun. Na kukat Adan nan blé Dwata  
libun én di kenen, én i yaanan nan. Na én i  
dagit Adan dun Iba. Too fye nawala du landè  
klikòla na landè sasè fandamla fa. Là ale sasè  
nawa na là ale mlidù dù. Na là ale lamsak  
klaweh dù bay déén di kite Dwata landè kyàla.  
Én i kagkah Adan uman yaanan Iba di kye fa, du  
landè fa salàla. Na tanimò nan Dwata nam duh.

Na di gfitun duh taftud Dwata nan. Neyen  
kdee tanimoan too fye sa.

Là mimen Adan uman Iba ku Dwata  
(Dyénisis 2-3)

Kafdu én mimò Dwata i fye gumnè Adan  
uman Iba. Én dagit tukay gumnèla én Iden.

Too fye baweh gumnè én du nun dee bung kayo na bulek na Imanaf fa. Na nun fa yéél magu di gumnè én dù. Na landè sabat déén na too fye ktabò kdee déén di Iden. Na déén di gutngà gumnè én nun satu kayo én dnagit Kayo Mlé Klawil Landè Sen. Na nun satu fa dagitan Kayo Gugmadè Fye lêman Sasè. Fnè Dwata Adan uman Iba déén di Iden du dale nifat tukay gumnè én.

Na nun man Dwata di ku Adan du kayean ku mimen Adan kenen na kanbongan nawa Dwata dù. Man Dwata di kenen, "Di kdee bunge i kayo fakay kmaan gamu bay bunge i kayo dnagit Kayo Gugmadè Fye lêman Sasè nang gamu kmaan én. Du di duh kagkaanyu bunge i kayo én, mati gamu." Na fakay nalék Adan uman Iba ku mimen ale Dwata ku demen là. Ku là ale mimen Dwata na fanlayam Dwata ale. Na landè klehewla i man kanak i nawala ku là ale mimen.

Na satu duh nun linge Iba talù na teenan i

ulad. Én ulad én talù di kenen. Man i ulad, "Man, tatulen Dwata gamu là fakay kmaan gamu di klit i kayo di gumnè ani?" Na én ulad én busaw. Na busaw én dagitan Satanas. Di kye kenen kasaligan i Dwata, bay du laan mimen Dwata na falwà Dwata kenen di langit.

Nè nean tnime1 Iba Satanas, "Kdee kayo ani fakaymi knaan, bay nun alò satu kayo là fakaymi knaan. Kayo én dnagit Kayo Gugmadè

Fye lêman Sasè. Taman Dwata di gami, 'Nang gamu kmaan bunge kayo én. Ku kmaan gamu too glut nun fatanyu fati kadang. ' " Na man i ulad én, "Ah, là gamu mati. Bay gadè Dwata ku kmaan gamu bunge kayo ani na too fye i fandamyu nan, na lêman dù kdee gadèyu. Én duenan là mayè Dwata ku kmaan gamu bunge kayo én. "

Klo talù Satanas là fa kmaan Iba i bunge kayo én, bay meye di kayo na teenan bunge kayo én too fye baweh. Na én man nawan fye ku too matlu i fandaman gambet i dad muleh. Kafdu én, là mlo nwean i bunge kayo én na knaanan. Duh én tagalékan fandaman là mimen Dwata. Nè nean banlén Adan i bunge kayo én na kenen dù kmaan. Taman gamsalà ale du là ale mimen man i Dwata di dale.

Na likò ale Dwata nan. Mahal fandamla nan na manla, "Fye ku nun klaweta nan. " Na kagtalùla én na nwèla bong doon i kayo na nimòla i klawela. Likò ale ku teen ale Dwata du gamsalà ale di kenen, du takmaan ale i bunge i kayo én. Na landè klehewla nan di dale na talà nan manak i nawala.

Nè nean lingela i talù déén di fye gumnè Iden én. Na én talù én Dwata. Na kaklingela talù Dwata én na salbuni ale kenen. Bay teen

Dwata ale na manan di ku Adan manan, "Adan tanè ge?" Na too likò Adan tmimel bay manan, "Dwata, iingegu i taluam bay toogu likò du landè klawegu na én duenan salbuni agu." Na man Dwata di kenen, "Simto tatmulen ge landè klawem? Takmaan ge bunge i kayo én mangu di ge là fakay knaan?" Na man Adan, "Én libun blém deg, fankaanan agu bunge kayo én na takmaan agu nan." Na kaklinge Dwata én man Adan én na tasnalekan i libun manan, "Tan i nimoam gine?" Tmimel i libun, "Kmaan agu du tnabug agu i ulad."

Na too mliù Dwata du là mimen Adan uman Iba kenen. Landè dademe kiboan bay fanlayaman ale. Talà fakay mnè ale nan déén di Iden.

Na funah fanlayam Dwata i ulad én i Satanas. Na man Dwata di ulad én, busaw én, manan, "Du nlakam Adan uman Iba salu di sasè, mdà di duh ani là ge magu gambet dademe Imanaf bay tatì kagum fulu di tanà. Na mdà di duh ani snangnawa ge uman dad libun nan. Na mdà di duh ani dù galam fnoon dad libun uman dad ngaan kadang kel di atuan. Na lèman dad ngà dad ngaan kel di atuan fnoonam ale."

Kagtalù Dwata én talù kenen di lagi i man i libun. Manan di ku Iba, "Nun bong kaflayamam kadang di fulé duh ku sut i dad ngaam. Na klom mnè di tah tanà nun gal gaslokam." Na kafnge talù Dwata di ku Iba lèmanan talù nan di ku Adan, manan," Du mimen ge i talù yaanam na takmaan ge bunge i kayo én nun dù kaflayamam. Na klom

dini di tah tanà nun too kliduam nan na nun  
kaflayamam mimò, du fanngabalam dad kliduyu.  
Na nun kadang teenyu tmabò di tanà sabat,  
mgange, na uman dad dee bung sual. Na ku  
mayè gamu kmaan là fakay ku là funah fuleh,  
kamlo, makol, na kamtu, uman kdee bung nimò  
klom mnè di tah tanà. Na satu duh na mati ge  
na i lawem samfulê di kfung." Én tagusen talù  
Dwata nan. Kdee kaflayamla én mdà di  
kagsalàla di Dwata. Bay too kamdo Dwata dale  
fa na nun bangan di dale. Tulen Dwata dale  
gablà i To Mlé Klawil Landè Sen feben di tah  
tanà kadang di fulé duh. Na To én falwaan kdee  
dad to di salàla du tulusan mdatah fa di tulus  
Satanas. Na dù To Mlé Klawil Landè Sen én  
fdanaan Satanass kadang di fulé duh.

Nè nean falwà Dwata ale di Iden, du kalu  
kalu kmaan ale kadang i Kayo Mlé Klawil Landè  
Sen. Na ku gamkaan alè én là ale nan mati na

nun kaflayamla kel di atuan. Bay landè dademe  
kibò nan mati ale satu duh du gamsalà ale di  
Dwata. Na là fakay nan samfulê ale di Iden du  
fka Dwata satu kasaliganan déén di gufusuk salu  
di Iden én.

Old Testament Stories in  
Sarangani Bilaan

00.13-571-5.1C

22.60PC-713017MCPZ

Printed in the Philippines